



Matheus Langius in Sueuia natus & educatus fuit. Hic felici ingenio præditus literis operam dedit, & in uirum maximum apud Germanos euasit. Erat enim multis uirtutibus et singulari dexteritate in rebus perficiendis præditus. Itaque Maximilianus Cæsar eum plurimum dilexit, in consilium asciiuit, atque res maximas, præsertim in Italia, expedire iussit. Postea quoque apud Iulium pontificem effecit, ut is anno 1513 cardinalis crearetur. Cùm etiam Leonhardus Archiepiscopus Salisburgensis uita functus esset, Matheus hic anno 1519 substitutus fuit. In eo loco magna autoritate per 21 annos præfuit, atque Carolo Cæsari & Ferdinando regi gratissimus extitit. Nam 19 anno, cum Electores Franckoforti conuenissent, Caroli legatus existens, pro eo Imperium petijt & impetrauit. Sequenti etiã anno Aquilgrani coronationi interfuit, & in primo congressu Electoribus Cæsaris nomine gratias egit. Eam autoritatem postea conseruauit, & in comitijs quæ uoluit impetrauit. Erat Matheus procero corpore & facie honesta uerum macilentus insignis. Cum autem laboribus & annis exhaustus esset, tandem 1540 obiit, atque Salisburgi in cathedrali Ecelesia ante chorum sepultus fuit, iuxta Vuichardum à Polnheim, qui & ipse Archipræsul anno 1315 ibidem collocatus erat, cum hac monumenti inscriptione, quam ipse 1565 Salisburgi existens legi, & huc ascripsi.